

manda in scrittura quanto richiedeno, ma prega la Signoria non sia dato copia fuora. *Item*, manda le lettere patente del re Ferdinando, che li animali se trarà de Hongaria possino passar per il suo per venir nel dominio veneto, et zerca li roveri de l'arsenal, che la cosa è stà rimessa al vescovo di Trento etc.

Da Cremona, del Venier orator, di

Come la marchesana di Monferà ha mandato a offerir per uno orator una soa fiola per moglie al duca di Milan, et il duca di Mantoa non vol più quella fia fo di re Fedrico, ma voria tornar in haver la fia di la ditta marchesana di Monferà che zà li fu promessa, et la marchesana li ha risposto che la morte di suo fiol è tanto fresca che non li pol per adesso far risposta. *Item* scrive come il principe di Orangie ha mandato a ditta marchesana a dimandar una di soe fiole, al qual *etiam* rispose la morte del fiol esser cussì fresca che non li pol risponder. El qual orator è stato a casa di lui sier Gabriel Venier et li ha ditto questo, dicendo, madama voria più presto dar soa fiola al duca de Milan che a altri, et l'ultimo saria quel di Orangie per voler lei esser bona italiana, però ricomanda la pratica a la Signoria nostra etc.

- 215 In questa mattina, in Collegio, fo gran controversia fra li avogadori sier Ferigo Renier et sier Andrea Mocenigo el dotor, con li avogadori (*sic*) et li Proveditori sora le Victuarie sier Domenego Venier, sier Justo Contarini et sier Thomà Donado, questo perchè li Avogadori voleno esser sui superiori, et loro dicono come hanno le parte di Gran Conseio di la soa creation voleano che i non habino superiori le soe termination, et sono a la condition di Proveditori sora la Sanitade. Et fo parlà assai per una parte et l'altra et *nihil terminatum*, poi in Quarantia fu fato in favor di quelli sora le Vituarie.

Da poi disnar, fo Pregadi, et fo leto le lettere soprascripte.

Da poi fu tolto il scurtinio con bolletini de far 8 di Savi sopra le tanse, *videlicet* 2 di 15 zà electi, in luogo di sier Francesco Arimondo è censor, officio con pena, et sier Antonio da chà da Pexaro è proveditor sora la mercadantia, *etiam* con pena.

Electi 8 di XV Savi tansadori, del numero di XV, con pena.

- Sier Zuan Francesco Badoer è di Pregadi, di sier Giacomo 115. 61
 † Sier Sebastian Renier è di la Zonta, qu. sier Giacomo 139. 41

- † Sier Filippo da Molin è di la Zonta, qu. sier Hironimo 176. 53
 Sier Giacomo Pisani è di Pregadi, qu. sier Domenego el cavalier 91. 95
 † Sier Antonio Foscari è di Pregadi, qu. sier Nicolò, qu. sier Alvise doctor procurator 133. 49
 † Sier Ferigo Vendramin è di Pregadi, qu. sier Lunardo 140. 41
 † Sier Marco Navaier è di Pregadi, qu. sier Antonio 147. 36
 † Sier Domenego da Mosto è di Pregadi, qu. sier Nicolò 139. 45
 † Sier Piero Bondimier è di Pregadi, qu. sier Hironimo 152. 31
 † Sier Piero Diedo è di la Zonta, qu. sier Francesco 124. 60
 Sier Christofal da Canal è di Pregadi, qu. sier Zuane 98. 81

Fu posto, per li Consieri, Cai di XL et Savi del Conseio et Terra ferma, atento la fede del signor Paris Scotto et del signor Alberto suo fiol, è a nostri stipendi, al qual fo dà provision, 1514 a di 25 zener, in vita soa a la camera di Bergamo ducati 600 a l'anno, che ditta provision da poi la morte del prefato Paris Scotto pervengi al conte Alberto suo fiol *ut in parte*. Fu presa. Ave: 147, 28, 6.

Fu posto, per li ditti, che trovandose creditrice Samaritana relita Bertoldo di Medula del qu. Vincenzo suo fradelo *olim* contestabile a la porta di terra ferma di Zara, di ducati 518, et per sier Zacharia Valaresso *olim* capitano di Zara fu fata certa sententia contra di lei, la qual fo taiada in Quarantia, per tanto a la ditta di danari de la Signoria li siano dati ducati 518. Ave: 130, 18, 17.

Fu posto, per li ditti, poi leto una suplication di una vedoa relita qu. Vasi Psari stratioto, morto al nostro servizio, qual ha quatro fioi, che a la ditta li siano dati ducati 4 per paga di provision a la camera de Vicenza a page 4 a l'anno. Ave: 145, 6, 2.

Fu posto, per li Consieri, che hessendo stà eletto, per li parochiani de Santa Maria Formosa, piovàn prè Alvise (*Tentori*) prete titolato di la chiesa, in loco di prè Piero Corona morto, sia preso, che sia richiesto al legato la confirmation. Ave: 123, 2, 1.

Fu posto, per li Savi a Terra ferma: Fo deputà a la cassa de le presente occorrentie il pagamento del signor Guidobaldo fiol del capitano zeneral nostro, et la cassa è molto ristreta, per tanto *de coe-*